



餘廉堂集卷五目錄

疏

聞警預防疏

援兵安插疏

防禦機宜疏


清查驛遞疏

釐革民害疏

議

寄三弟衷虛睦族議

族姓相保議



餘廉堂集卷五目錄

終

餘廉堂集卷五

金壇吳履中暄山父著

栢鄉魏喬訥辨若

同邑後學李

喬訂

真定梁清標玉立

祉

門人

栢鄉魏喬介崑林

男

初輯

寧晉王元晉雪麓

祐

疏

聞警預防疏

崇禎八年

竊照敵國眈眈虎視未嘗一日忘我去秋闌入宣雲雖

餉據而去其垂涎內地正未饜也深謀窺伺矢不虛發
今茲復舉倍可寒心彼蓋知我腹心被賊國家兵力厚
集東南於是乘間而動撓我肩背使我內外交訌勢分
力薄是彼橫行得志之秋耳以臣度之巳巳之變遵永
一帶捲掠殆盡徂秋之役宣大三雲搜搶幾空則其意
不在擾我近邊直欲窺犯內地不待智者而後知矣觀
其發難以駸駸蠶食雖未懸軍深入而門戶一破輒漸
肆憑陵則今日者犯畿南而搶臨德固其謀所必至已
若撼三協昌平等處則是舍瑕攻堅禦之猶易爲力特

恐敵計未必出此何以明其然也丙寅以前敵數犯寧
錦以西番爲藩籬勢不能越此趨山石耳迨鹵番北徙
敵遂越山石而趨喜大以我備山石而喜大單虛遂致
縱橫蹂躪直薄城下遵永收復之後中協之備視昔加
嚴敵是以不復東窺直圖南下收插而徑赴雲谷矣宣
大北連沙漠易於衝突所恃爲右輔門戶者居庸紫馬
三關耳三關之險不亞山石視喜大諸口尤過之敵所
以撼之不動而廢然返也然亦嘗南折而攻竹帛間道
從大翟口麻子山嘗平口等處進攻茨溝勢已岌岌幸

將士用命堅守津保兩鎮之兵相繼而至乃能堵退茨溝之險固不及紫馬遠甚然山勢層峻猶有可恃迤南而龍泉固關則紆疎坦衍無復巒岒峭疊之勢間道甚多萬馬可入控守難爲力矣上年敵尚知舍三關而扣茨竹其謀愈久則計愈工而取道愈熟此一舉也安知其不更南走而闖龍固乎如此則長驅而前如入無人之境縱三協諸關處處嚴整總歸虛著而大事去矣計必借兵力之有餘補天險之不足以名將重兵控扼兩關則從此迄山石如金堤罔缺可恃無恐矣臣竊謂今

日之計宜大爲第一重門戶督勵捍禦使匹馬不入是爲上著茲備關鎮處處防禦是爲要著選將提兵保塞龍固尤爲急著三協諸關兵馬整臺素經整葺第一布置料理不煩增設而處之裕如若自紫馬延袤以至龍固綿亘千餘里界口百餘處原設軍丁龍固二處各百餘名其餘隘口衝者數十人緩者不過數名無事時哨探譏盤尚多疎玩欲其堵禦大敵其將能乎真保主兵止萬二千餘分防晉豫業去其半以不滿萬之兵派守千餘里之地勢必不給尤欲置一大隊以控萬分喫緊

之龍固安得不籲請調發爲畿輔重地急綢繆也若止就見在兵數支吾分派必不能僥倖萬一以冀無虞若待臨時上請倉皇失措封疆之責誰任其咎廟算周詳神謨淵斷非臣愚劣所能測窺然妄揣敵情未必盡謬而夷險虛實之間恐亦敵所熟籌以爲避擊者也撫臣張其平親臨倒馬鎮臣董用文親履馬水各于初三初四等日星馳前去閱視要隘分發固防臣敢不敬竭駑鈍以隨其後

援兵安插疏

崇禎八年

竊照近年征調兵將其所經過駐劄之地茂弗騷然則由訓練無素紀律未嫻將兵者之過或亦芻粟不供區處無法有以致之則地方官胡得不任其咎也臣四月初旬按部晉州一聞調援卽檄臣所屬州縣凡係援兵經行處所預備芻糧以待毋敢缺乏隨于本月十四日疾趨鎮城料理各關隘所需米豆草束等項面諭檄催不啻再四時撫臣張其平移鎮紫荆弗及面商機宜拾七日據臣膚見移文知會內云師出無律適以病民安插乖方難以束伍今調津兵三千關永兵七千防禦加

以主兵萬餘布置得法調度合宜鼓勵有道可以固吾
圍矣師行糧食軍需爲急芻束之供已督州縣官速辦
復檄催之必不敢泄玩取戾軍與民勞勢所不免惟恐
軍譁而民擾未得調防之益先受調防之害則束伍安
民不可不亟講也一議分派三關天險可憑茨溝以南
倍宜加戡除巢總鎮一軍專控龍泉外客兵七千合計
主兵共得若干某口合用若干因其險夷酌其衝緩以
爲多寡因以多寡酌用將兵者之優劣而輕重布之勿
可紊也一議料理某口兵若干合用米豆草束各若干

器械若干火藥鉛子等項各若干關外哨揆撥馬若干
如何傳警如何號令如何瞭望如何巡邏如何分之則
整飭不亂而各自爲守如何合之則呼吸立應而併力
堵禦不可不著著打算處處周詳也一議處置古者行
軍自立營寨不奪民居自行炊爨不侵民食故所過秋
毫無犯所至安堵如故也今則帳棚盡廢指白屋爲營
壘釜灶不設寄庖厨于市肆姦淫搶掠習爲固然小民
吞聲飲泣無所控訴豈仁人所忍言哉況鹵山一帶民
居寥落不足安軍士之身食物鮮少豈能果軍士之腹

是民病而兵亦未嘗不苦也且居食並資民間一旦有警始登埤守信倉皇失措將復就民而居食之乎將移民之居食以就之乎勢皆不能不識從前何以苟且支吾竟不一計及此也以今計之分派既定米豆鹽菜等項各爲措辦薪水就近採汲每兵五名給鐵鍋一口就中以一人或老或稚者主炊爨又一伍給菊棋蓆數領爲一棚晝則憇息夜則寢處以避風雨則民不擾而兵更逸可以專力防守而無疎玩之虞可以休養精銳而無奔波之困誠兵民兩利之術也等因移至撫臣將臣

所議三款隨牌行該道照牌事理卽便親歷各關隘口會同主客將領查照分派料理處置妥當詳報臣亦隨行催飭五月二十八日據井陘道臣孔聞詩申詳到臣內開前項遵依行據真定府牒行關糧二廳查議分派料理去後今准本府管糧馬席通判牒稱准此隨移文天津總鎮標下旗鼓守備王羽拜龍泉關把總陳友志查照分派料理去後今據天津營總鎮旗鼓守備回稱本鎮巢丕昌統領官兵三千一十四員各於四月二十六日抵龍泉關卽將官兵分派各關要隘口駐防嚴密

外其糧料照數支領所云鑼鍋水袋火藥鉛子俱隨營
製備足用卽分發各隘設備停當不必再議其蓆片窩
舖之設本鎮領兵卒至龍泉關地居深山萬難露處勢
不得不借民屋以安插也今旣蒙院道恤民愛兵議備
蓆片搭窩舖誠爲兩便第津兵三千每伍人一舖用蓆
十領共用蓆六千領其椽本繩索不與焉撥馬偵探事
宜已蒙本鎮差家丁前往代州一帶直抵宣大等處偵
探但龍泉關尚在腹裏匪同邊鎮不便出關遠哨然本
鎮身膺重任一切事宜相機調度萬分嚴愷者等因到

廳據此又據龍泉關把總陳友志呈稱轉行巡捕守口
等官照欵遵行責令該管軍識備造軍火器械等項文
冊呈送到廳據此除主客官兵所用器械火藥鉛子等
項據津營旗鼓王泐本關把總陳友志開報俱係隨營
備設足用無容再議其津營官兵駐防龍泉等隘口該
營揭報每五人一舖用蓆十領共該蓆六千領其椽木
繩索不開哨探之事該營隨撥的當家丁二十名前往
代州一帶宣大等處偵探今查該營議設給兵苫蓋窩
舖棲身軍民兩便合無俯將本廳牒報原派定州等五

州縣葦蓆三千領麻繩一千三百條鋪草六千斤每五人一鋪議給葦蓆五領可倍菊蓆十領之用細麻繩五條鋪草十斤令兵丁自行苫蓋庶軍民兩便再有續調防兵酌量多寡另文再議前項蓆繩鋪草俟事平掣兵之日就令本關把總收貯備用等情到府呈詳到道備詳到臣隨卽批行如議散給其續到關門官兵查酌多寡照前派解另文詳報又據開天津營官兵分派信地一龍泉關防守官兵一千三百一十一員各一長城嶺防守官兵二百一員各一舊路嶺防守官兵二百九員

名一鐵桶村防守官兵二百四十一員各一石嘴防守官兵二百三十八員各一婁家莊防守官兵四百七十七員各一胡八溝防守官兵一百七十員各一黑崖溝防守官兵一百七十四員各臣又接到監紀關永援剿官兵永平府推官耿始然開報山永各營官兵分派信地一狼牙鐵嶺口防守官兵九百員各一茨溝竹帛牛邦口防守官兵九百員各一固關往來策應隨征目兵二百九十九員各一固關楊莊口防守官兵一千零五員各一娘子關起近十八盤口止防守官兵九百員各一

劄馬關防守官兵九百一員各一十八盤等口防守官兵一千三員各等因各報到臣據此該臣看得調援官兵道路間關既有跋履之若山谷荒僻又無食息之安皇上軫念辛勞方且特頒欽賞俾將士感激思奮臣等職叨畿輔義切同仇敢不協心戮力竭蹶從事其在主兵則鎮臣董用文分布約束各得肯綮客兵則鎮臣巢丕昌部伍整嚴夙嫻紀律關永兵除副將王秉忠駐防紫荆非臣所轄不敢與聞外副將李重鎮曉暢肅慎叅遊都司徐士昌金斌王承祖陳三捷劉一瑋韓平等皆

能申令飭紀未嘗有驕恣悍縱之習加以撫臣之籌畫道臣之拮据監紀推官耿始然之隄防守令各官措辦芻糧罔敢玩悞是以兵不敢譁民無所擾向時所過或有閉戶罷市者者今則貿易如嘗向時所止或有竄徙避匿者今則相權無間臣深爲畿南之民稱慶幸焉且師克在和封疆有賴臣敢借此恭慰 聖懷惟是芻糧雖具曠日難支兵氣雖揚疲苦當恤自劄馬至固關邊長口多其分防者主兵十之三客兵十之九惟鹽菜取給餉司而粟芻盡資真屬舊穀旣沒新穀未升計目前解

會集 卷五
運可支兩月而物力竭矣秋獲之期尚遠匱乏之慮宜
周兼以深巖修嶺中溽暑之所鬱蒸風雨之所侵濕糧
糗僅敷無腥旨以飫其腹蓆棚粗蔽無室宇以豫其身
去枵腹露處者一間耳暫且苦之久奚能忍時下敵息
猶緩則已糜其食疲其力萬一突如其來適當食盡兵
疲之際慮有策之不應鼓之不前者臣所爲鯁鯁過計
而不能不望 皇上之重加軫注也伏乞 勅下戶兵
兩部從長酌議求所以稍紓民艱休養兵力之計臣遵
奉施行則畿輔巖關所仰藉廟謨匪淺鮮矣

防禦機宜疏

崇禎八年

古者天子以王畿爲室郊圻爲堂國爲門戶八荒爲藩
籬夫難馴莫如八荒顧能以之爲藩籬者撫馭有道而
不失其心也最上以敵攻敵次亦能使敵爲我用國家
西北一帶沿邊餌賞藉爲屏蔽迨遼左失陷倍宜聯絡
諸番使搏心效順以遏敵人西突之謀關寧險固易守
我兵專力堵拒俟精勁整暇之餘漸圖恢復猶不失勝
算柰何駕馭無法撫賞失宜致屬番遠徙三衛之地悉
以資敵是以有遵永之變敵近復收併插部束明卜套

孽風降附我之藩籬盡被捲撒近攻之計已成蠶食之謀已偏以今日大勢言之晉地爲剝膚而畿南誠岌岌矣臣是以酌其衝緩度其堅瑕逆其趨舍而鯁鯁慮龍固也若謂藩籬旣撒則自漁陽上谷以至東勝榆林處處可入卽竭天下兵力以守勢必不給臣竊謂今日之計當陽守其所不攻而陰備其所必犯何以知其所不攻也以有所必犯知之何以知其所必犯也以其志意所向知之而何以知其志意也則以從前之著數近日之舉動圖我之情形知之敵從前著數極穩得尺則尺

得寸則寸未嘗敢輕進懼其蹶也得遼寧弗守懼其分也彼固以全力圖我矣遵永何以守懼斷其歸路也去秋何以不深入西番未盡附慮其或爲我用也今敵未至突入肆掠志不在大也然則異日者儻或大舉入犯則必併力鹵晉萬一失守則直走順廣而蹂躪京川其或遣航旅順而犯登萊更或以偏師突三協而窺薊密以撓亂我師徒亦計之不測者要其全力則必用之西晉與畿南矣臣于六月二十六日接井陘道臣孔聞詩塘報內稱敵九萬已至五臺遂單騎赴關欲與諸將議

固守計兼攜牛酒之需以勞行役途次接小報知非大舉度其遊掠必急去不敢逾險深入三關可無慮矣卽語鎮臣巢丕昌董用文及副將李重鎮等敵茲不能爲畿南患但不可以出口弛防此敵輕進無謀使得飽掠而去將益有輕我國之心爲憂方大因歷閱關隘倒馬關臣三月間已經巡歷今有撫鎮駐防外六十里爲插箭嶺天險可憑迤西而跌馬崖自道安狼牙落路諸口皆有分派官兵守禦但委官齎給犒銀臣未紆歷直詣龍泉關關外二十里爲長城嶺內甚險峻外卽平地嶺

南北城梢山勢厰漫人馬可行若據城爲守敵必不仰攻從南北城梢裹入則守兵反在外彼可倒攻而勢不能支矣且南北俱有小口竟達龍泉守甚不易惟自長城入關二十里間山勢層峭澗道不寬可以設伏可以衝擊娘子關截河爲城險不可逾南河城梢山甚高而不峻人馬可度北河山坦竟可馳突雖有短墻不能爲之限也固關內外俱險最宜設伏而關門隘聳東西兩梢嶺峯怒起岸巉不可犯迤東至楊莊口南北兩山對峙中爲石河阻水爲障澗則百騎可以並驅水不嘗瀦

會身堂集 卷五
大可慮也南則孤撮歡喜驢駒麥穗諸嶺白石後溝石榴段里諸口山勢就夷又南則平崗散漫接順德邢沙西界險與守兩失之敵得嚮導則長驅而入矣大率敵擁衆突犯必循大川或由岡嶺疾馳取勝使我師阻而不出方敢散掠過越險阻更無顧慮若小口隘狹人可潛度馬難馳驟進退受制彼必不入倒馬固關易守難攻所慮者龍泉娘子關可以倒取楊莊口可以徑入所深慮者邢西一帶平疎坦漫更可前歌後舞而行耳國家嚮急東北備加嚴西南稍緩三關舊爲腹裏則又緩

而備弛甚國初倒馬止設巡簡景泰二年始設守備嘉靖二十四年因敵犯大同游騎至關外始改設叅將守備改移插箭嶺當時止備北敵敵未嘗深入倒馬以西番騎所不至竟不設備茨溝營止設巡簡守礦洞嘉靖三十二年始改設守備萬曆元年閱視侍郎汪道昆以礦地重大守備不能彈壓始題將真定龍固關叅將移營駐劄二關各設把總一員受其節制防礦非防敵也今敵入楊芳口越代忻而搶繁峙五臺則今昔之勢殊而緩急之辨明矣若夫守禦抑有道焉兵法曰善守者

藏于九地之下莫要于扼險莫妙于設伏扼險則一可當百寡能却眾設伏則以守寓戰以剿成堵險與伏相須爲用者也險不在其所不攻而有已設之形存乎其所以必犯而爲可憑之處或關以內外澗道左右據之則敵不能踰失之則我不能守夫地有九變有六形審而用之可以制敵死命趙奢曰先據北山者勝其險得也至于設伏則兵與器相爲用以臣所親歷有兩山曲折而彼此不相望者有兩山對峙而中無旁徑者有高陽當騎側而馬不得馳矢不能及者有中開平廣人馬可

屯聚而前後俱險隘者皆可設伏處也或伏卒隱廬出其不意或積薪以焚滾石以擊或暗藏大砲或埋設機弩機橋地雷之類或布置地鋒釘板陷筒之類如設機阱以捕猛獸惟恐不至至則未有不戢擒者敵若一經覆蹶必不敢輕入若處處皆陷阱而不知吾固備其所必犯也是必得智能忠實之將經營其地凡爭衝重地之勢通支挂隘之形無不周知無不熟算若作室家而堂與牖戶之必謹若治田畝而溝洫阡陌之是勤無隙不斂無間可乘而後其守能固然須用主兵昔范仲淹

會原堂集 卷五
議守策謂久守之計非土兵不可先臣商輅亦謂紫荆
倒馬諸關宜用旁近官兵守之京營兵無固志不可用
蓋用土兵則以山谷爲窟穴乘障爲幹止習而安之人
自爲守今所調關津兵亦非盡土著于關津者畢竟視
彼爲鄉關此爲逆旅心力與地方不相副久則有并州
故鄉之思搖搖莫定守豈能堅且坐糧旣給行糧復支
餉亦糜費若偶警暫調事平旋撤亦奚不可令敵卽暫
去而奸細之口屢稱十月犯搶京川未必其給我也使
無狡逞之謀則兼併塞外者何意布謀內地者何爲縱

尚有宣雲之門戶在而屢入屢出未嘗能遏其銳擊其
情則畿輔安危全係此一重關隘況敵卽去矣未敢遽
撤於旋踵之期敵復來乎何能立赴于旬日之內是權
宜則議調防而經久當思定制較論天下大勢今日之
紫馬已急于昔時之山石而易犯之龍固尤急于天險
之紫馬桑土綢繆豈俟再計決哉保定鎮臣有訓兵二
萬之請足以控禦紫馬起黑石崖至銅錄崖悉屬其總
轄而區畫之其自鐵嶺口西南直盡邢沙境合無特設
總鎮管轄兵卽不能過多二萬似必不可少雖不及另

倉庫堂集 卷五
募而關津之兵似可撥而移也建牙署置營房住劄固
關合伍操練番休防守設險布伏藏機出奇屬其專責
龍泉見止一把總當移茨溝營叅將守之裁把總官改
設守備一員於茨溝固關轄四十九口而邢沙以西不
與焉相其衝緩添設守把數員總領于固鎮則雄威屹
然不獨爲畿南保障天下且藉爲長城矣

清查驛遞疏

崇禎八年

驛遞至今日而無地不稱苦矣畿南爲省直咽喉罷苦
尤甚在無事時皇華四牡輪蹄不息已云煩難軍興而

後徵兵解餉羽檄縱橫兼之兵將往來車騎輜重報探
差役絡繹續紛晝夜如織官吏走卒奔命不遑弔鎖鞭
笞楚痛萬狀此苦累在驛遞之人猶可言也一方之民
爲驛遞所苦累更有不可言者凡驛遞應役必頑嚚黠
猾不惜皮骨不畏榜笞耐勞忍辱之輩非鄉民朴野拙
脆所能勝其任也向年差少則頑嚚黠猾之徒包車攬
馬食其餘利迨應付日繁工料裁減此輩房產鬻盡漸
及妻兒掉背去者十之八九及議召募小民畏避苦累
莫肯承當有司計無復之僉派于是乎始一家不能辦

則以數家夥一差甚至徧派里社有幾分者有幾厘者有幾毫者贏餘之家懼而投役公衙傭身貴顯或央求情囑或賄浼吏書巧力者免脫受累者皆中人之產拙實之民耳中產不能應全役而求減免于分數毫厘之間則蠹差之口奸書之手皆得諭訛招搖而民費已不資矣拙實之民畏官使懼榜笞則又購夫向之頑嚚猾者主其事而惟所指使焉積年巨蠹見鄉愚可魚肉於是出而應之一入其手則索騙原主多方科派差愈繁而彼之獲利愈廣或以無爲有或以少作多盡傾馬

戶之產未饜也則又告更攀貼以行巧取之謀卽有官斷私幫難填谿壑之慾久之貧者盡逃而富者不能獨免富者盡貧而率土總屬蕭條興言及此不覺悲憤交集泣涕無從民之苦累于驛遞至此極耶使驛遞之役不甚罷苦則不至累民若此使非軍興差繁則驛遞之罷苦不若此卽軍興差繁而額編工料未經裁減當亦不至交困若此則今日而欲實實甦甦甦甦民非復原編不可内外交窘之時臣曷敢以此請士民願從地畝起科增之毫厘求脫于湯火中臣曉夜思維法蔑有善于

此者然爲民請命而遺朝廷以加派之名義不敢出惟
有竭臣之力不畏強禦不避怨謗爲之清理禁革計必
先使差不苦驛而後能使驛不累民夫差之苦驛者需
索爲甚臣嚴革已久而包攬之奸未除幫貼之弊未剔
則明禁而陰徇之一則不能忍其鞭笞一則恐其打傷
馬匹一則借以苛索馬戶財不自己出且可因之爲利
夫豈有靳焉今幫貼盡革已塞其源凡遇官使車兩馬
驢如數應付不得違悞寧受鞭朴不許與錢或因需索
不遂鎖毆吏卒毀辱官長打傷羸驢跑死馬匹許驛遞

具呈叅處驗實追賠至於濫用夫馬私行牌票屢奉

明旨禁革乃前站不帶勘合差役不照火牌各衙門私
行牌票輒與應付此中冒濫何處稽查臣設循環簿二
扇凡遇前站差役俱要勘合火牌照依填坐原數逐日
登記月終送臣衙門倒換查核如故匿不與照驗不准
應付用剩夫馬不准乾折照用過填記以見節省至於
牌票則臣衙門先自禁革凡差役會稿與催督未完勘
簡事理並不給票用馬道府各廳一槩不得擅用夫馬
牌票至于鎮將等官齎奏本冊塘報軍情俱有火牌亦

不得私用牌票惟是內使所差但執紅旗爲號不用驛馬另選民間臆牡馬匹預先喂養以待稍不如意輒張威肆毒間有假充內臣差遣執旗嚇索無從辨識傳牌止寫一姓無從查其名字紅旗止稱某公所差併無從稽其各姓宜將勘合火牌與驛照驗以杜假冒至欽遣緹騎與王府差官俱當一體遵行違者容臣題叅處治如是則耗費旣汰冒濫復清差役簡少而後召募可行僉派可免又慮積奸巨猾見幫貼雖去而夫馬錢糧不苦煩累遂應募包攬窟穴把持必至利已病人作奸生

弊宜嚴行驅逐專用殷實人戶充當恐拙實不能應役將慣在驛遞提鞭人役雇用恐奸猾見事權已去嫉妬心生暗唆逃躲俾馬戶計窮因而求彼復得肆志臣令各驛將提鞭姓名呈送各該州縣取有保給不致逃躲養馬之家善遇之使其樂爲用而積猾不得售其奸矣至于各所則有夫頭之害夫役皆自車戶領之凡遇差使出錢雇覓豪棍視爲奇貨將應覓夫役空閑時與之酒食或借與錢米以羈縻之車戶雇覓彼輒承攬取利差多夫少則倍加勒索不遂其意則使夫役藏匿車戶

無從雇覓官使催促不得不聽其主張有一站路一名夫勒錢七八百文者夫得其半彼分其半車戶飲恨莫敢誰何臣令各州縣將夫頭查取姓名併隣佑保結在官視程途遠近爲夫價多寡遇寒天雨雪每名增錢十文著爲定例遇有雇覓車戶出錢夫頭出夫錢不足則責之車戶夫不備則責之夫頭需索之禁與驛馬同而夫役之患除矣其在偏僻州縣不設驛所止有走遞夫馬俱有額編錢糧雖經裁減州縣官加意料理儘可支持並不許僉派里甲如有因循玩違臣廉訪糾劾必不

隱徇至於支領工料向爲驛蠹橫據椿放急債重利盤算領銀入手指揭官帳指扣盤纏指稱使用百計侵尅且幫支有扣書辦工食有扣抄傳邸報有扣經臨費用有扣擔水磨麪有扣茶果茶葉有扣長差半差折乾有扣以至門役館夫防夫傳遞公文接抄勘合該管房科嘗例俱有扣焉實入馬戶之手十無二三焉得不累又有賤兌蚤給預支透領侵騙逃脫貽累馬戶者臣查驛遞料銀俱解府支領站價協濟解必以時逐月支放初五爲期驛官馬戶領銀至縣各照應得銀數分兌包封

印官抽驗復兌當堂唱名散給分毫悉歸馬戶至如州縣有相沿舊例探馬若干匹每年領乾馬銀若干兩府前州前沿途三處撥兒馬若干匹每年領乾馬銀若干兩又各府儒學雇馬每年分領乾馬銀若干兩又衙官驛所占坐馬匹分領工料銀若干兩今止撥馬一匹乘坐免其徒行以全官體從前弊竇盡數革除則額編絕無侵分而馬戶不患疲累驛遞苦累既與湔洗而凋憊者甦斯一方之民不復有僉充幫貼爲驛遞受累者矣臣恭誦 恩詔甦驛一欵悉心釐剔廣諮博訪始盡得

積弊而除去之不啻疾痛之在身也州縣各官迫于疲窘不能調停亦時勢所使有不得不然者積弊相沿煌煌明旨尚多屑越地方有司遇官使經臨惟恐缺少夫馬耽延時日致獲罪戾冒濫折索皆強有力者所爲有司安能禁止使斯民不爲驛遞所苦耶臣仰體 皇上祇遵功令一蹈夙弊卽以白簡從事藉 皇上威靈以提挈有司未欲徇人先思累已則有所畏憚而不敢違玩且怨怒總自臣受之彼亦得藉口以謝官使而處于無咎之地矣

無心登革民害疏

崇禎八年

竊惟帝畿爲天下根本殷富淳龐之俗禮義文雅之風宜稱首善爲四方則效今觀其民士紳豪右而下居室無論華廠而茅房土屋之無棲衣食無論輕肥而懸鶉半菽之不給民有饑寒之色老無肉帛之供家鮮擔石之儲市乏貨財之聚蕭條困苦救死不贍弱者垂首喪氣甘爲辱賤而不辭強者跋扈鴟張公行劫殺而無忌生養道失教化不行胡爲其然哉苛政害之也大要有四曰召買曰俵解曰徵收曰驛遞人人知之亦人人能

言之旁觀非之及當局又踵而行之監司禁之弗止撫按劾之弗畏屢旨飭之弗遵若牢不可破而相率爲固然者未有能窮法與弊之源流設身處地必求可行以爲責成之地者耳驛遞之害以弊積而法窮第去其弊而法自行臣已繕疏入告三者之害則法窮而弊積惟正其法而弊自止臣更一一爲 皇上陳之召買米豆大縣以數千計小縣以數百計部價定米一石銀一兩豆一石銀六錢每石各扣腳價銀五六分不等實在米價九錢以上豆五錢以上耳稔歲穀賤有何難辦數年

來荒旱相仍米價二兩以外豆價一兩以外則一石而需兩石之值矣若買米千石須賠銀千餘兩買豆千石亦須賠銀五六百兩一縣有買米八千石豆八千餘石者須賠銀一萬數千兩從天降乎從地出乎欲責之衙役豈有能勝其任者乎法于是乎窮不得不派之里甲而爲患甚矣發價徵收必假書吏之手發則有一番尅落收則有一番羨餘兌給解戶又有一番尅減其派買也吏書委之總算總算勻之里甲里甲則又派之花戶照地畝爲多寡猶公平畫一之法也相緣爲奸豪強者

或免或減愚弱者偏有偏多升合斗斛之間取其盈羨以爲交納之地有無多寡之際隨其伸縮以爲賄索之門且有價未給而先行派納者卽價見給而吏書扣之總算尅之里甲侵之實入花戶不及部價之六七矣收納旣完則僉解戶船戶車戶吏書復有賣放展轉之弊及解至津門則有經管上溜扇颺平尖鋪廩諸役作奸措勒而掌承之書辦催比之快手固頭管囤巡攔倉夫打掃斗級臥批抽批以至委官各有嘗例如其例而斛面淋尖亦不能省一違其例則刁掇遲延或致陰雨滯

爛解戶賠累不堪有傾家蕩產不能完其局者召買之患如此何以祛之臣爲之法曰酌時估蚤發價專責成而諸弊俱掃去矣穀價與時高下貴賤不可預期通融數年之內較量豐歉之嘗當時部價亦匪漫無斟酌者約畧計之美補不足似可爲準第歉年適多值而經手非一人輒爲所窘而調停無法耳派買定額無容議更滋擾惟每歲秋獲之期臣與撫臣酌訪市價知會各州縣併咨部查算貴則溢于部價之外而于折色扣補賤則縮于部價之中而又補還折色登場之際年雖歉而

價猶平倉箱之餘歲雖豐而值恒貴必于九月發價十月買完斯價不踊貴糧復早竣其於部價多有餘而鮮不足矣何以知其然也畿南市斗浮于津斗二升如應買千石止須市斗八百以千石之價而買八百則名雖一兩而實浮二錢若歲不甚歉寧不寬然有餘乎酌估以市價爲準應買千石者止須給市價之八若市價一兩二錢則適合部價之數若市價一兩則買未千石餘銀二百兩增入折色解部豆亦如之但召買銀兩原留用太倉正項兼用新餉雜項太倉新餉俱爲正額若雜

項則如抽扣銀雜支銀祇候馬夫銀各載條鞭中若稅契銀紙贖銀撥補銀或民間未納或前後異時多不湊手以後各州縣俱用正項銀若正項未徵則于本年分徵完銀兩中有應支而可緩與應存在庫者動給蓋米價有高下而銀數無增減酌其緩急可也發價必印官照知會市價算明兌足當堂給付買役銀限九月發完糧限十月買完各先後詳報違者叅處至于領銀牧買交納小縣糧少可數人大縣可十數人是彼領卽自彼收卽自彼納以一手始終之若給銀者一人承買者又

一人收納者又一人解運者又一人則尅落侵扣之弊種種不可詰矣解運原有腳價不許再派車戶船戶至交納嘗例等弊懇 嚴旨禁革然實實官買官解不用富民解戶則此輩苛索之念亦自息矣間有徵收本色之議派之地畝以算糧銀似亦便民而升合分計萬派千流貪吏奸胥必有多派侵漁之弊甚或以本色爲額徵而鞭銀濶徵入橐不可行也俵馬每匹額價二十四兩工料六兩昔日邊市互開孳育繁甚人求以馬易銀二十四金儘可得上駟今則邊市不通寇賊搶奪求以

銀易馬非四五千金安能獲騰驥之選乎昔時五穀價賤養俵甚省今則久不逢年豆草俱貴工料亦不敷矣昔之頒式雖三尺七八寸而六寸者亦堪入選今則定以三尺九寸或四尺焉覓其如式者抑又難矣馬自州縣印烙及抵京過寺堂交分寄養近者浹旬遠者月餘途次間關倍費工價至于使費則自管馬廳以達之寺院部每匹有費銀十三四兩者每馬百匹費銀千數百兩兼以馬價之高工料之費每馬額價外少計之不下十五六兩總計之則俵解百馬賠費二千數百兩將欲

州縣官設處乎賢者未嘗苟取則點金無術不肖者旣剝民自潤又安肯出篋中藏糜之公役乎將責之衙役安得此巨富之役不惜破產賠墊假使衙役堪賠亦得之吮民膏血且必得其十九方肯用其一二其爲民害又惡可勝道哉法于是乎窮而不得不可行僉派一僉派則花戶視爲畏途社書居爲奇貨情囑讐攀賣放之弊種種出矣有濕頭焉解役是也有乾頭焉幫役是也濕頭之役有正有朋幫頭之役或攀或脫究竟鄉愚不能勝任則又雇倩一慣熟之人代之慣熟之人復居奇刈

會原堂集 卷五 三
割其買馬也則串通書快先覓驗中復串通賣主擡勒
高價欲舍而他求書快執稱驗中而不許欲止與平價
賣主挾其必售而不從于是有價值三十兩而買之以
四五十兩者其俵解也則又多索工料倍科使費迨至
駁回復勒今重買中人之產一馬足以傾之大縣幾二
百匹可傾二百家小縣數十匹亦可傾數十家年年傾
之民可以存俵解之患若此何以祛之臣爲之法曰議
馬價定差役權尺寸革使費而弊端可悉杜矣州縣俵
馬谷有本折色臣請稍縮折色以益本色每馬增價六

兩而工料仍舊在額供不過涓滴之需而小民得免無
窮之累當亦 聖慈所弗靳者凡給價宜蚤使其暇裕
求當勿致急迫難辦宜以銀而色數俱足勿以錢而以
千作兩差委則用的當衙役旣屬在官之人必不復爲
在官者所侵勒而平價可得良馬以彼買卽以彼解不
必更覓慣熟之人而工費省卽看驗衙門知非富戶而
誅求輕矣按圖索駿自古難之戰馬衝鋒破陣雄健爲
上不全在高宜以三尺七寸爲準量于分鬃之際不于
腰駝之間使有定處而不得高下其手使費一途在外

如有司之扣尅書役之侵需臣皆得執而問之若罔寺一馬有云費五兩者有云七兩者臣所轄四郡計歲額俵馬四千二百餘匹卽以五兩計之亦二萬一千餘兩小民膏血幾何供此輩吮吸如是也伏乞 皇上渙發嚴旨罔寺部院等衙門使費嘗例通行禁革奸胥瞞官作弊自難掩于解役之口如有留難指勒臣得據實入告不敢以忌器爲嫌也若夫徵收錢糧則預徵三分專指加派新餉非通計全數總爲十分而徵其三也若以全數論則如一縣原額銀四萬每季應徵一萬預徵三

分則萬二千矣隔年冬季安得不徵完來年春季而且徵及夏季二分乎見年春季復應徵秋季二分以足一萬之數所謂畝比秋冬者冬雖必無秋亦宜有何足爲過惟專指新餉一項斯春季不宜徵完而夏秋更邈不相及然勢有必不能者何也試據大名一府言之加派新餉每年銀三萬三千七百兩有奇預徵三分該銀一萬一百一十餘兩解部充春季兵餉乃八年津糧俱奉部文于七年買于正月解三月納米豆計一十三萬二千八百餘石該銀一十萬六千一百餘兩俵馬本折銀

會原堂集 卷五
共五萬七千五百餘兩春運限以十二月到夏運限以
正月到亦應十一月正月支發而營鎮之兵餉銀驛遞
之額派銀俱按月支發則正月分錢糧須十二月解到
若止預徵新餉三分則此數項錢糧從何設處若愆期
不至則叅罰隨之爲有司者急之則得罪于百姓緩之
又得罪于功令課殿之罰與鴻鴈之哀不能交顧而兩
全則急亦過緩亦過方圓不能並畫而法又窮矣于是
恤民之心不勝避罰之慮則寧急毋緩僅求及額而預
徵已溢于三分之一之外矣然民所患苦不在此亦不止此

不在此者秋收以後蓋藏之時非甚歉年樂輸固其分
爾且循其名則爲預徵稽其實則提後居前年年此數
第量出爲入不至浮于額外可矣其不止此者百孔千
磨紛頭亂緒臣請勿嫌煩聒而悉數之人但知火耗病
民其弊在官然而賢者自能潔已不肖可以法懲乃其
病在官民之間合狐鼠之衆以蒙蔽一人州縣不能察
道府不能禁流毒有不可勝言者有司徵收錢糧惟知
比較里長于是里長索之戶頭戶頭索之花戶必總彙
于里長而交諸櫃頭經一手輒有一番漁獵其小者耳

乃有借火耗之名加二加三以歛編民而多派少納者
有隔年隔季預收花戶而展轉生利者有任意花費指
稱花戶拖欠者有飛灑詭寄影射遺漏者有私加多派
私製重等者有巧爲捲梢私收銀錢者有收錢以一千
三四百作銀一兩而支放止以一千作一兩者有用銀
匠印記恣其多索卽令起解包賠者有錢銀不入庫藏
一任吏書收管致侵費無算究追不得攀害平民者蓋
指不勝僂矣然亦何莫非有司之責顧乃無法處此而
重爲民患耶臣爲之法曰盡革里頭預定分數平準出

納入庫收支而叢弊其一空矣不用里長戶頭則管催
者何人令每戶各立一印單開徵時信手點花戶一名
領單知會將應納錢糧自封投櫃已完者交與未完通
完則原單繳官未完者比較日期執單赴比監收不貪
櫃頭大縣櫃六中縣櫃四小縣櫃二每月每櫃撥吏書
一名主之不得有所專屬致日久弊生如此則出于民
卽入于官雖有奸猾何從漁獵其間乎若分數未定則
房書社書交通爲弊私派溷徵今將州縣應徵錢糧應
增應減算定分數隔年先造赤曆預送道府磨對每州

會身室集 卷五
縣每畝應徵幾分幾厘幾毫先給道府印信繇單張掛各里社使民咸知今年所納錢糧該有若干然後開徵恐未徧知併刊刻于戶單之前更將各季收過錢糧赤曆流水底簿逐一查算奸書卽欲飛灑多派何所施其術哉若夫錢價有貴賤法馬有重輕錢價則斟酌適中以一百一十五文作銀一錢不復隨時增減如是收亦如是放出示曉諭使民皆知法馬則用較定天平齊欵活針以此納卽以此出凡三錢以下納錢三錢以上納銀花戶自兌自封自投不許加毫釐火耗銀皆傾銷成

錠銀匠印記一兩以內與火錢六文一兩以外與火錢十文委解自有衙官不許委用銀匠使得借端措索錢不入櫃監收者逐日交庫收貯銀俟拆封兌明包封印記入庫各置號簿分登出入按季清查絲毫不經吏書之手又安至乾沒侵欺不可究詰直待水落石出方令變產追賠粉骨難償則又妄攀無辜告累富戶甚且借完官之故開騙局而潤私橐也哉以上諸弊臣拜命之始詢訪得其大畧入境後諄諄告戒不啻三令五申若召買俵解二事臣三月間已有刊刻告示如有僉派幫

貼等情令民赴臣衙門告訴叅處而不肖之尤如藁城
平山兩縣知縣已經臣叅劾奉 旨提問有司卽甚不
自好誰無保全身家一念從前稅政畧已湔除第臣未
嘗作外吏一切情弊遽未洞曉不能設爲畫一之法以
整齊之有司勉強支吾豈能持久廣諮博訪夙夜尋維
始得窮其爲患之弊更爲畫其祛患之法不避瑣屑備
陳 皇上之前倘蒙嚴勅遵行則苛政盡黜民害盡除
畿南之民若出湯火而登衽席生養旣遂教化可行仁
漸義摩風移俗易數年之間稱首善而固根本當不徒
在想像間矣

間笑

議

寄三弟衷虛睦族議

居家以敦教化厚風俗爲本近來人心儇薄習爲澆爭
吾家祖父歷世一心以挽回培植爲已任典型旣遠脂
韋成習強梗者禮法所不能制悖逆者父兄所不能董
淳雅之俗變爲囂凌長厚之風駸成浮薄吾雖奔走四
方每念先人之遺訓時變之流遷輒爲痛心思以救正
無何遘國大難萬死一生雖此心無愧世俗之見鮮克
原諒懷慚悔伏不敢復與門外事然而救時篤族之意

則寤寐不能忘也嘗思張公藝當五代雲擾之秋乃能
保世滋大未嘗有仇離竄徙之患豈非和氣積于門內
而神人悉呵護之之所致哉世變不可知門以內事吾
儕不可不勉吾弟生平方介未嘗隨俗依違可繼祖父
之志然往往有任人做壞不急救正之處謂爲所得爲
而不強乎其所不及爲此于天下事則可若族間事則
祖考臨之在上宗支質之于旁推而委之祖宗以爲不
孝而篤族之誼妄自菲薄非仁人君子之所爲也吾弟
勉旃

族姓相保護

救荒者弭亂之策也救荒無策宜令思弭亂者策之凶
歲窮民思搶奪富民思安保則欲弭亂以守富富民之
同心也富民自爲守曷若一方之人共爲守一方共爲
守必先一家之人自爲守一家之中主伯亞旅以及于
分支遺裔莫不有水木本源之誼焉其有無宜相通其
緩急宜可持然在今日行之直理勢之不得不然耳一
邑之內著姓之家有大富貴可以周數百口者其次可
以周數十口數口者有田宅華腴蓄積饒厚者有家藏

鉅貲不治產第者有田多宅廣素無積儲者外人弗知族人知之一族之內各有分長一分之內必有賢能推其人集其議料其衆定其差上富某某其次某某又次某某讀而貧者某某耕而貧者某某無常業而貧者某某統如干人一年之食應如干斛上富其次又次各應備如于米及麩麥以贍或減價難雜或計口授餐或交易稱貸讀者無荒其業或以訓子弟耕者無舍其畔或以充傭僱游惰無常業者食人之食則必事人之事非衰老病廢咸責以所能爲而課其成其有跳梁不軌分

長賢能執拘以歸於官縱則有罰務使通族自相保愛其始也聯一族如一體其旣也聯衆族如一族無事相安有事相救度此凶歲以免於流離死亡之苦劫奪傷殘之禍豈非人情所甚樂哉若夫寒宗單族有數什百家聚庭以處無一能賙給人者率多佃紳豪家田宜責紳豪贍之其不爲佃田之人則世家大族力能贍數千人而族之貧窶無幾者是在賢父母勸令出粟以賑更多方設處以相賚恤而又緩徵止訟與民休息則饑寒盜賊舉不至爲吾邑大患恤緯之憂挈瓶之智約畧如

是伏冀同志廣為倡帥務在必行

...

...

...

...

...

...

...

...

餘廉堂集卷六目錄

啓

答陳振寰

復宋老師

答謝象三

侯宋老師

答宋九青

復劉梧陽

尺牘

與陳賓之

寄公澤弟

與史武璵

與虞素心

寄高心逸

復盧斗瞻

與吳天石

與楊叔來

答段永思

答陳鹿萍

答華章明

與新都令周學舜

寄張重我

與華雍明

與尹撫臺

復祁下柔

與二長史

與新繁令趙履吾

東祁按臺

答陳葢亭

答吳木峰

答李君賓

與黃廣文廣

與賀太守

東高心逸

與呂鶴澤

東禹漕臺

東周芮公

答吳天石

與祁西巖

與李君賓

與嘉侄書

餘廉堂集卷六目錄終

餘廉堂集卷六

金壇吳履中暄山父著

栢鄉魏裔訥辨若

同邑後學李喬訂

真定梁清標玉立

較

社

門人

栢鄉魏裔介崑林

男

初輯

寧晉王元晉雪麓

祐

啓

答陳振寰

恭惟老年臺望隆山斗品重珪璋拔幟詞壇寶樹煥芳

館身室集 卷六
菲之色鳴絃花邑甘棠森芟芾之陰星懸一路兩地榮
河前係去思今歌來暮循聲蜚動京華旣聞久矣叨譜
籍之末者邀有榮施矣

復宋老師啓

伏以風高栢署遙乘止道之驄命簡楓宸獨表朝陽之
鳳隔儀刑而增戀託緘素以抒忱恭惟老師台臺廊廟
瓌材鼎鉉偉器金門通籍早騰雲漢之光豸府宣綸懋
著冰霜之譽時傍黃扉簪白筆允矣池上夔龍試看鐵
面帶銅肝洵哉軍中韓范栽培桃李共推水鏡無私辨

別蕭蘭咸賀門牆有慶某材輕洩淳誤入藥籠之選質
囿駑駘猥承鞭策之功學鵬翮之摩天畫榆枋而捨地
顧茲寸進實藉鴻恩未展結草之私先沐投瓊之寵揣
分何堪捫心知愧第春風之座雖遠尚祈鼎命提撕而
泰山之望彌高願以丹砂點化恃鞭長而可及雖汲短
以何憂念切就雲情殷立雪僭陳竿牘仰企爐錘臨啓
可勝瞻注之至

答謝象三

伏以石筍翠巖光接寶山瑞靄金峨赤 香來鶴水清

風欣遇星臨均沾河潤恭惟老年臺背負天風氣搖海
嶽摩空獻賦超東南之寶於機雲遊刃發硎擅銅墨之
良於卓魯都人士想聞其風采彊弗友畏避其光芒馴
雉懸魚立普隨車之澤飛鳧帶鶴行膺賜服之榮伏念
某單門朽質冷署涼材星軺夜發仰看斗七之文棠蔭
晝濃喜近魁三之象蘇旻覆露馬牛非難及之風芝宇
披雲烏鵲有可依之月思馳庇宇夢遶受屢未展瞻依
之悃遽叨顧復之恩五嶽匪遙層霄猶薄矣用拜嘉於
明貺旋披愫於來侔統冀炤涵曷勝馳仰

候宋老師

伏以補浴九天狐鼠憚觸邪之氣澄清一路豺狼匿當
道之踪威震南中化行江表草木濡其榮澤桃李藉其
餘陰恭惟老師台臺兩間正氣百代偉人瓊林韡鳳九
苞彩麗之天葩鐵柱神羊一角孤高之風采屹屹不廻
之概沛發忠葵稜稜獨立之標光寒諫草騰飛霜斧巡
行秋肅澄江鷺擁星軺到處春回口海虛懸膽鏡幽遐
無不照之區平握心衡細大有至精之品伏念某瓦缶
陋質樗櫟庸材誤蒙國士之知忝就門人之列韻軒轅

之律呂宮商夔下焦桐揮郢匠之斧斤黼黻溝中斷木
頃從泗上仰謁高山樞趨百里以登龍羅列八珍而賜
燕領談泱髓餐教鏤肝直灑然脫師弟之形骸更何以
異家庭之骨肉過承溫霽溢沐恩私天高地厚鑄丹素
以何窮日居月諸感蹉跎之已久愧乏涓埃之報更思
滄海之波申錫自天措躬無地敬陳蕪啓聊布私衷

答宋九青

伏以麟產士鄉嶽降神而出類龍登宋國蠅附驥以齊
驅志傾同道誼洽稠情恭惟老年臺器凌朝玉學軼郊

祁廟賈壘短曹牆才涵萬狀董班香標宋艷書破千言
雪裏飛鴻之句絕烟火於塵寰壁間衝蚪之文披霞濤
於物表年少成名爭羨芙蓉出匣學優登仕佇看蔽芾
成陰琴入武城誦聲錦燦河陽花影化能馴雉政若解
牛伏念某單門弱植冷署涼材京邸偃仰忙隨馬首東
西旅思牢騷慵聽雞聲上下忽覩雲中錦字倍思天際
真人千里襟期五雲懷抱臨啓無任瞻依

復劉梧陽

伏以靈鍾赤壁躡雲空冀北之羣化執玄樞施雨灑江

南之潤名高西楚慶洽東吳氣既協於畹蘭澤更深於
轍鮒恭惟老年臺貞元粹質川嶽奇珍綜金薤之琳瑯
夙蜚英於天路飲玉壺之沆瀣先小試於雷封甘澍遍
萬家奚啻馬昌惠澤秋霜飛五月誰誇江邑神明慈蔭
交榕清心印月倡絃頌於一隅燭劔光於萬里安仁之
桃李成蹊單父之陽鱗屏迹昔南州高士義風著乎炙
雞長沙鉅公仙躅傳乎化鶴比之今日曷足以方伏念
弟材慙運甕學愧使星郵亭看劔幾塵斗七之文樂土
受厘喜近魁三之象自愧匏瓜未脩書記之候忽投拱

璧遽辱寵賚之存心知銜戢口莫揄揚

尺牘

與陳賓之

捧讀大疏言言刻骨字字血誠具見孝子肝腸併覘大
儒作用所以明懷正氣上感聖明天語森嚴逆高虞不
卽膏斧鑕哉年兄此舉匪直老年伯冤氣頓消快然遊
於天上諸凡含情負氣之屬靡不共舒其憤共惕其志
知天下無不終平之怨氣無可倖脫之憲網世道人心
俱藉一震勵年兄真人子哉

寄公澤弟

六月間得進使署差足藏拙懸想吾弟獨當一面用其
所得力者爲生靈造福爲朝廷做實落事真可歎羨聞
吾鄉大饑米價至一兩四錢此吾輩有生來所未經見
者吾輩托賴祖宗德蔭得有今日一應親族窮困不無
待以舉火而不能有所賙給奈何丹徒令鄭之尹丹陽
許光岳皆敏練有幹當爲吾地方福星也可幸無慮耳

與史武璵

一別三年契濶如此令人不堪消受伯母之變實爲心
惻老年伯健飯如舊而聖天子溫注聿新喜躍何似弟
濫竽使署歸省無期如焦如渴付之莫可誰何而已

與虞素心

楚中夙稱有材親翁以文章宗匠懸鑑而衡之瀟湘洞
庭之間髦士雲起儘堪入彀真千古快心事也欣羨欣
羨

寄高心逸

大江頭搖扇引觴轉眼又經秋矣爾時吾兄榮發兩情
歡洽然故人千里晤面無期離別之懷亦隱隱見於眉
鼻間悠悠之思何日忘也楚中故稱饒腴數年來未必

無疲罷之苦吾兄誠心愛民撫循有道當不負此地也
吳下盜賊蜂聚白晝殺掠年雖未稔尚得強半而已如
此若再告歉將奈此洶洶者何大抵此時可深慮者人
心而已誠能惠愛而孚綏之使之翕然不解不惟禁止
令行無不可爲而且足爲朝廷保障彼晉陽非巖邑哉
勿謂地小民寡有翫心也惟吾兄善爲之

復盧斗瞻

年兄鍾圖山玉柱之氣映發眉宇間每一晤對輒令鄙
吝都消望而知爲廟堂偉人今大敷借重濟酌妙手中
外並推聖天子已洞悉優異紀於太常指顧便膺峻擢
勲名炳日月間矣猥劣如弟安能有所矢効爲高深一
助惟健羨鴻猷誦明德無旣耳

與吳天石

敝友荒湖刻二種塵覽冊葉二張惟意所之一爲點染
又紙半幅明年家嚴七旬家慈六旬丐一言光寵之其
生平不及縷悉約畧具見封綸并塵台炤

與楊叔來

別後至青浦適鄭澹老以按君臨境出入戴星僅得一

面今調松陵年兄曾相會否皦皦自矜相對漠如也幸
勿以世法求之返棹束裝百事如蝟行李蕭然神形俱
瘁矣及入都門稍得憩息謁客之暇儘可讀書奈精神
散亂披帙茫然譬之饞燈祇能照□機績便暗耳始信
仕優之學終鮮實獲年兄家食尚得二百餘日雖素養
閱厚再爲努力幸毋悠悠度之一入世途回想此日便
不可得珍重珍重

答段永思

昔柳子厚司馬營陽至今且芬人齒名邦名公自足相

副台臺胸藏石鏡望繫萊樓九疑瀟湘未足與較高而
繫深也其爲海內屈指能有幾哉不肖僻居西鄙弗論
未及交天下士卽暱邇如台臺竟未獲一叩光儀惟陋
故可知已還記做秀才時編摩大篇奉爲師法不啻左
右提命之其所嚮往然耳幸博一第謂得卸却酸寒乃
冷落使署日與風塵爲伍反不如窮措大神閒慮淡惟
與筆研作生涯也

答陳鹿萍

四川直指

前誦大疏裕勦之勢而後可收撫之功海內奉爲名言

去冬大舉非台臺之威烏能使其怵焉喙息哉大率逆賊恃其山川深險力未易施高皇帝嘗謂其地險峻人與猿狖無異大軍一至竄入林藪宜駐兵屯種待以歲月方可圖之其不能以旦夕得志明矣賊嘗謂不怕軍多而怕糧多蓋久困必將自斃則未議兵當先議餉且賊之黨可以糾而合亦可以攜而散也我陰有以制之而不爲用則賊勢自孤彼卽咆哮於巢穴之中知其不能飛而噬矣芻蕘之言敢冀採擇第明問下逮不能負此虛懷耳

復劉梧陽

弟自月正初旬入都門病不去身嘗作一偶云無事惟添懶有病可酬閒殊可笑歎老父母剛和並用威惠覃敷凡血氣心知誰不輸檝長安中嘖嘖芬人齒牙弟卽未及矢口已有津津誦之者下石之言何從而至哉縱有之亦不能入正人之耳寸雲尺霧胡足蔽皦日青天可置弗問也弟家計蕭然羈旅日久旦夕難支卸累老父攢眉焦思弟時時念此寢食幾廢伏想老父母垂情顧復稍一紓解旋復軫結茲奉命冊封蜀府往返萬里

度十月杪方得底家征途之苦所不遑惜如門閭之倚望何仰賴垂青真生死骨肉之誼百身不能報徒矢此心不敢自昧惡僕某如虎如螫縱之必罹其害此弟所知之極真而籌之極熟者也白晝殺人黑夜奸盜皆其長技弟知而不言以老父母深愛弟必爲弟除此母俟深言耳若其罪惡未極未彰何苦以不必然之慮惓惓於仁人君子之前哉且弟生平剛強不足柔恕有餘雖螺蠕草木不忍誤傷其生獨於此奴不能釋然其情可知已幸垂察焉

與陳鹿萍

被命西來計程雖遠歷嶮甚難然斗山在望旦暮冀展龍光不復爲苦不虞同差黃懷老行未及陝聞訃免歸中州兩院具題復請事在秋仲之初卽奉使者兼程遄往約十月杪可到蕭蕭客路其何以堪比至新都衝隘之地似難久居直趨省中恐有未便進退維谷度日如年台臺何以教之

答華章明

旅食燕邸屈指歸計無端羈旅此間賈浪仙所云并州

是故鄉良可悲歎

與新都令周學舜

適見府文月供非敢固辭第知之不早昨已行票錦官
廿七日卽移去所惠不敢拜必欲仰承上意或止給數
日之需可耳

寄張重我

貴池令

奉使蜀藩爰得周歷貴鄉山川人物之盛王右軍所云
得果此緣一段奇事也但因同差黃懷老制歸未卽竣
役候節使者久之未免有天涯遊子之悲耳

與華雍明

嚮晤孫序班備言採辦事故如心紅一節每斤平價八
錢以上而官價止給四錢以此募商商必不應以此委
官官必不任計必照平價給發則募商可委官亦可耳
倘每斤賠四錢千斤便四百蜀地卑官多日給不敷曾
有輿金之任圖竣此役者乎老先生必籌之熟矣幸採
末議酌而行之

與尹撫臺

誌誦尊刻諭老先生濟世鴻猷範人宗匠竊其緒餘便

足發皇吏治表監他年真所謂鼎邊雞犬拜賜無窮矣
錦城絲管人間能得幾回聞况迎暉門外作客風塵者
乎渝州明月依稀入望第天半峨眉未可卽耳浣花諸
勝間借騁懷而景適情騷譬之饒燈不能照機績負愧
多已

復祁下柔

德政錄所載頗見台臺作用而未探其體且亦未盡其
用也頃以親炙所得略綴數言謂台臺遠神大用有不
盡於此者復易數字請郢以付剗刷近聞旨下豫撫委

官賚節旬日內想得竣事言歸天涯故人尚得瞻對否

與二長史

熊以光

曹應星

府中僭禮踰閑慢上忽下以不佞所聞古賢王之風邈
矣卽今王府如此行事者亦未之前聞不佞欲以耳目
所覩記入告天子使知朝廷之尊而懲僭妄之習且將
與臺省諸先達議而行之承台論或當爲委曲然不可
不使自悔過而遂默默已也兩台臺職居輔導不敢不
以聞

與新繁令趙履吾

弟行次渝州矣江山之色漸已改觀綵懷故人幾回清
夢悠悠我思實遠且長想台臺亦能念之生祠額僭擬
曰懷興妄意謂民懷台德而更興起後人也因是而演
爲聯句云思公之德今恩斯勤斯民之不能忘也式公
之政兮頡之頡之繁其猶有廖乎不識於台意稍有當
否併書而呈之以博一噓

東祁按臺

恭惟老公祖台臺拯世伊夔匡時方虎直聲素著於朝
宁風裁倍凜於寰區况此多事之方尤切來蘇之望頃

者法星下照遐邇欣瞻不孝伏守丘墓未敢以不祥之
名突冒尊嚴茲緣闔邑士民留縣父母覲邑紳合請台
堦不孝乃敢附候台社兼陳柯令之不可不留者敝縣
僻小介於宜溧兩邑亂形未戢而下或匿之上或諱之
爲憂方大再一潰裂敝邑爲剝膚之災非賢明父母撫
定而防禦之生等不能無身家之慮憶昔在長安時與
姜顓愚年兄語秦晉間事抵掌拊膺慮及桑梓顓愚謂
一二年蘇常之間必有發難端者而言竟中矣今無識
者輒謂已安已定與怡堂燕雀罔異某竊謂非得祖臺

神謀妙運指顧而消弭之難必其不爲秦晉之續也此
祖臺於地方一大弊緊事不可不擇留一二有識力者
以佐下風若夫勤政愛民冰操犀照則人人能頌之某
不敢贅惟冀台裁

答陳葢亭

承惠佳參如獲秘寶家慈藉以頓安感刻不可言記室
論心不以富貴遺寒士退而詡詡寧在酒食隆殺間然
珍饌已蔽席矣謝謝

答吳木峰

新城令

不孝雅慕高賢矢心締好雖素無接塵之遊縞紵之誼
於海內名碩意往神來多有得諸聲調形畛之外者台
臺鍾三湘間氣羅八斗雄才實政鴻施著之歌謠拈之
薦剡真所謂超軼絕倫不孝心儀之冀旦暮相遇者謬
辱隆存千里貺問知己之感鏤之肝腑間寧有諼哉

答李君賓

不孝故貧賤士人世不堪之境無不備歷人生至苦之
味無不備嘗今雖稍稍進趨嘗謂行已不及古人功名
遜於今人貽羞知己然生平所交游不我遐棄猶以不

見外於故人爲幸獨台丈高睨矯足十數年不得一見
每一念至悵悵不可言

與黃廣文廣

溽暑未及脩候常耿鄙懷時下爽氣襲人中元節屈丘
墓廢人何敢稱賀顧茲萬里澄空淨同冰皎一輪霽魄
輝映壺光野人芹曝之忱有鯁鯁不容已者薄采谿毛
用將敬悃莞茹爲榮

與賀太守

某幼食貧寢食舉子業垂二十年始得上公車掇一第

當年按劍不啻三折股矣爾時自矢謂異日者倘得司
較士之役決不敢詘阨寒微實此志也茲覩老公祖藻
鑑平衡何容末議第邇來薦託沿爲陋規祈大破情面
務擢真才庶鑽營徑塞滄海無遺矣敢以葑菲之言仰
作風雲之合伏惟台鑒勿以爲迂

東高心逸

嚮聞年兄有臨清差長公輒御年嫂北行弟訝其太急
旣而聞年兄仍在部署深爲年兄快此止而爲年嫂惜
此行曹年兄竟有此阨爲之扼腕蹠足寢食俱廢可奈

何年兄雖有回奏之旨當不爲害曹年兄靜聽爲是年兄以爲何如

與呂鶴澤

隔一衣帶水江北苦澇江南苦旱若二天然極目焦稿半粒不登嗷嗷窮黎何以自活宜興亂民猖獗幾成燎原兼之歲凶相驅思亂者衆抱此杞憂恨不得借長才妙略爲地方一綏輯之也曷勝惄然

柬禹漕臺

歲旱民饑敝邑爲甚西成所獲較稔歲不及十分之二

嚮慮秋糧難措士紳合懇上臺折色改秬稍紓民困而功令嚴急未獲通融柯父母惠政懷民誠心動物不煩敲朴而輸納爭先子嚮妻惟恐或後以貽賢父母憂膏血俱盡僅乃得竣室家胥慶可幸無悞乃公事矣孰意旗軍臨兌梟獍之性難馴吞噬之慾無厭爭貼潤爭淋尖罔念民脂已竭索長例索腳價惟知已壑未盈負隅之勢莫櫻剗心之慘誰訴柯父母多方撫諭極意調停竟悍然不顧且掉臂去之其意將何爲也非飾詞以聳聽必徼命而苛求民旣弗堪官亦難忍不肖目擊心

傷不勝痛恨敢祈老公祖軫念窮黎垂青良牧特頒憲
諭嚴飭旗軍俾帖然領兌不致生端激變則所全者大
匪直吏民悅服已也至於米之乾潔無異稔歲此祖臺
所可委官看驗者不肖涇涇自矢不敢有所矯飾以溷
台聽伏惟炤原

東周芮公

敝邑糧務借重彈壓急公之誼愛民之誠必有兩盡而
愉快者第荒旱異常小民竭廬之入猶苦不足則質子
鬻妻而輸將恐後惟柯父母德政素孚有以動之而然

也旗軍刁索無饜額外苛求柯父母竭力調停竟悍然
不顧相率赴院深可痛恨弟致意漕臺指陳情弊具承
炤悉旗軍聞漕臺親臨懼法領兌及聞中止復將兌過
米糧退入倉口豈但知有漕臺而竟不知有老公祖之
威令耶萬祈執法嚴押俾無生事以激饑民國課幸甚
民命幸甚

答吳天石

公甄弟同門

老年翁時惻然以家弟爲念九原可作舊見銘勒家弟
藉此不死矣高情篤誼真能敦寬薄鄙振勵世趨非直

不肖弟感戢贊歎已也

與祁西巖

年兄奇人行事奇立功奇負屈尤奇近來曾有好消息否與其功而受賞不如功而見抑此中儘有受用士所當爲不止此積而彌厚高而難掩益深隕越之懼方是大作手古來英雄得以功名自全者頗不數數此可爲知道者言耳年兄勉旃

與李君賓

沈丈門第高舊去年左顧行舫見其儀狀偉都辭節嫺

雅令人括目竟肯以閨中之秀與不肖爲副室心甚異之頃兄言與談此滋然泣涕其情似有大不得已者父母之心人皆有之緣窻弱息倏忽適人於數百里之外能無痛於心乎嚮時或未及深思而卒然相許至此未必無悔且聞其女賢淑軼常天生美材必有佳偶不肖卽無忝於其人而年已過矣前所以爲此者誠汲汲乎爲未嗣計今敝荆已姪娠三月天或有以賜之此舉義屬當已幸爲不肖致此區區些需薄聘聊贈釐裝以速快婿不足齒及

與嘉侄書

姪謹篤真醇銳意聖賢之學湛然胸致沉渾不露圭鋒
吾甚器之所微妙者士君子博通包蓄須有函蓋天地
括羅萬象貫串古今靈炯炯豁達達一種真境界虛擴
無垠圓變不滯更當加之意耳先儒謂爲學以不欺暗
室爲先此卽慎獨謹幾之旨聖賢根基全在此處隨時
隨處實用其力始則強勉漸漸純熟自不費力暗室專
以地言不若獨知兩字該貫稠人廣衆中自見其獨吾
每過街市見紛攘之儔神情渙鶩茫不知身心安在昔

人所謂行尸走肉比比皆是若不自提醒偶爾放逸亦
復如是猛省輒覺所謂不遠復也禮曰儼若思此敬德
之容也放逸者必無此氣象所謂敬堯舜之兢業君子
之戒懼是也敬德之聚也不敬德乃散德是何物晦翁
謂行道而有得於心然有君子之德有小人德書曰
爾尚不忌於凶德可見人人俱有個德其善惡邪正淺
深廣狹雖無形像實有胚胎盤結於心無須臾離此人
之真面目也有君子之德而主以敬則聚而不散且日
加積焉所謂崇德非乎釋氏之學以放下萬緣一真嘗

會身室集
卷之六
三
湛爲入定法門若無時不然卽夫子空空如也境界然
必不能嘗嘗如此寂然不動感而遂通隨寂隨感隨感
隨寂如環無端若只求此境界稿心枯坐不至昏惰未
免遊情妄想忽起不覺覺而不正心堅力行打得過來
便到圓通無碍光明開普地位畢竟陰幽玄冥如螢火
月光無濟於用聖賢之學體用一貫明新合脉以用世
爲實際蓋天生物而厚於人尤厚於聖賢之人以斯世
斯民之責付之也負生質之美而不知從事於學聰明
務以先物才能務以利身甚至毀裂坊簡放浪詭僻狂

蠱人心蠹敝風俗是謂自暴自棄必知此身非吾之身
爲天地萬物所托命之身吾一自有其身便與天地萬
物不相似勝私過欲絕智去故格物窮理致知力行耳
目口鼻四肢百骸皆有所聽命不得逞其所欲而遂其
私夫然後此身非一膜之已而萬物皆備之體矣方能
與斯世斯民痛癢相關憂樂相共以天下爲身而不觭
以身爲天下而不靳乃於上天生我之意無所忝負吾
生平爲學主於不愧獨知其於周旋動容言語事爲之
間未能中節適宜誠爲多過若無欲害人之心無穿窬

之心雖未能充類至盡大端無所踰軼時時保護處處
提撕本來真良不至損鑿蓋自十五受學佩服義方之
訓加以師友所漸磨學問所灌溉四十餘年於茲矣事
親不能盡孝然時嘗以不能盡孝之處自咎自責親沒
之後負疚不解二人之音容未嘗有一日不宛然於耳
目之前非人所能知也兄弟之間雖未能盡友于之道
然同堂與同胞無異式好怡怡未嘗有鬩牆之隙夫婦
相敬如賓未嘗有反目之嫌媒媪之事因艱子嗣多蓄
姬妾閑於和敬體莊情洽未嘗凌越於禮其於朋友誠

信相與機心械事毫無所涉卽人以詐僞欺侮知而不
應久之或漸不相親或終歸於好凶終隙末未嘗有也
貧賤之交白首不渝有數十年不會面意中朝夕往來
有已作古人而憶其遺言追念平生無或釋於懷者又
有並不識面而慕其行能品望嘗若比肩而立者親識
平交一以信讓相接質買田產價值不虧毫釐但有就
鬻而力有未逮乃堅辭之未有垂涎膏腴而多方圖之
者居家儉樸無所費糜稍有贏羨輒寘產業往往歎其
半直以需之有所入輒償之母俟其來索故所直無減

短而所入皆成實用是以居官無苟取而產亦不乏若
如他人浮浪有得輒盡尚將旁貸親友魚肉細民惟日
不足望其銖積寸累以成中人之產庸可冀乎至於立
朝概畧較然在人耳目茲無容贅且家庭告誡非所及
也三子皆幼侄可留此以俟其長而示之使知吾生平
心跡學爲人子遺教尚不遠爾

